

Cots

I.

Egan, res qu'ieu vis
no·m det alegrier,
ni·m plac flors de lis
ni fruz d'aiglentier;
ans vau mieg ausis
de mieg desirier
e de benvolenza,
qu'e mala merce
m'a tengut Amors,
don mi ven l'esmais
e la greus dolors.

II.

Be m'a tot aquis
per son domengier
Amors, qu'ie·l so fis
et aman sobrier,
et estau aclis
al peyor guerrier,
qu'ieu ai gran faillenza
fait, car no·l sove
dels amors plors,
q'era m'es esglais
zo qe·m fon douzors.

III.

S'els huils abelis
Amors de primier,
mas li plor el vis
e·l douz cossirier
son al cor assis.
D'envejos mestier
no·m par malsabenssa,
qu'ieu am mais de re
leis don fatz clamors
e, can non pusc mais,
dic ne deslausors.

IV.

Tant jorn ai enqis,
per talan leugier,
q'ieu de leis auzis

blasm'o reproier,
mas cil del pais
son gen vertadier
de sa captenenza,
qe so q'il fa be
l'es grazit e sors,
et no l'es re frais
c'a leis si'honors.

V.
D'aitan m'obezis,
si mais non sofier,
volgues que·l servis;
e, si trop li qier
lo seu gent cors lis
d'un joi plasentier
humil, sa valenza
l'adouzis vas me
l'orguill; que sabors
m'es que tot joi lais
ans que·m vir aillors.

- letto 279 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/cots-7>